



3. oktobari 2023

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

**Naalakkersuisunut apeqqutit:**

- 1. Kommunini annaassiniarnermut upalungaarsimasut annertussusissaannut minnerpaaffissaat pillugit Namminersorlutik Oqartussat nalunaarutaat nr. 62, 1. november 2021-meersoq sumiiffinni qatserisartut ikilisinneqarsinnaanerannut periarfissiineq allanngortinniarneqarpa?**
  - a. Nalunaarut aallaavigalugu, sinerissami kommunit illoqarfinni tamani qatserisartut 148-nut ikilisinnaannut periarfissiinerat, naleqqussarniarneqarpa?**
  - b. Nalunaarummi tasanissaaq innuttaasunik amerlassusiliisimanerit Naalakkersuisunit upalungaarsimanissamut tunngatillugu pissusissamisoorsoraat?**
- 2. Suna pissutigalugu nalunaarummi inoqarfiit 30.000-it sinnerlugu inuttussusillit ilanngunneqarsimappat?**
- 3. Naalakkersuisut isumaqarpat atortunik annikinnerpaaffiliineq pissusissamisoortoq, aamma sumiiffinni mittarfeqarfeqartuni bilersuarnik imermik assartuussissutilinnik piunasaqaateqarnissaq eqqarsaatigineqarsimanngila?**
- 4. Nalunaarut naapertorlugu nunaqarfiit qatserisartoqarnikkut, inuttaqarnerat atortutigullu minnerpaaffissalersimanerat, Naalakkersuisunit pissusissamisoortutut isiginerpaat?**
- 5. Nalunaarut naapertorlugu piunasaqaatit eqqarsaatigalugit, atortorissaarutit imaani annaassiniarnermi atortut ilinniarsimassuserlu naleqquttut ingerlassinnaanissaat Naalakkersuisunit qanoq isumaliutigisimavaat?**
- 6. Upalungaarsimanermit Inatsit 2010-meersoq annikitsualukkaanik allanngortinneqartartoq ullutsinnut naleqqussaqqillugu suliarineqarnissaanik pilersaaruteqartoqarpa?**



7. Qatserisartunik ilinniartitsineq pillugu nalunaarut nr. 33, 6. september 2001-meersoq Upalungaarsimanermut Inatsimmut 2010-meersumut naleqqussarlugu suliarineqarnissaa pilersaarutaava?
  - a. Taamaassappat qaqugu tamanna piareerneqassava?
8. Qatserisartunik ilinniartitsinerimut aningaasartuutit annertusineqarnissaat Naalakkersuisunit pilersaarutigineqarpa?
9. Qatserisartut ajunngitsorsiaqartinneqarnerat assigiinngitsumik ingerlanneqarpoq, ilinniagaq imaluunnit akisussaaffik assigiittoq sumiiffimmi najugaqarnerat aallaavigalugu akissaasersorneqartarlutik - Naalakkersuisunit nalimmassarneqarnissaat pilersaarutigineqarpa?
10. Oqartussaaffiit upalungaarsimanermi suliaqartut pingasuusut (qatserisartut, politiit peqqinnissaqarfillu) suliassaqarfii suunersut ersarissarneqarnerunissaat Naalakkersuisunit pilersaarutigineqarpa?
11. Navianaatillit aallaavigalugit annertussusiliinissamut (risiko baseret dimensionering) inissiiniarneq eqqarsaatigalugu sinerissami qatserisartut aqutsisui ulluinnarni suliaqartussat pikkorissarneqarnikuuppat?
  - a. Pikkorissarneqarsimangippata tamanna qaqugumut pilersaarutigineqarpa?
12. Upalungaarsimanermik aqutsisoqarfimmik pilersitsisoqarnissaa Naalakkersuisunit pilersaarutigineqarpa?

(Inatsisartunut ilaasortaq Mala Høy Kúko, Siumut)

#### **Tungavilersuut:**

Nalunaarut nr. 62, 1. november 2021-meersoq pilersinniarneqalermat tusarniaanermi akissutini ersarissumik ilaatigut Kalaallit Nunaanni Qatserisartut Peqatigiiffiannit tikkuarneqarpoq, kaajallaasitaq nr. 1 1. april 1994-meersumi pigaartunik amerlassusiliinerit nikisinneqassanngitsut. Tamanna nunatsinni isorartuumi illoqarfinniillu qaninnermit ikiortissarsiornissamut ajornakusoortumi angerlarsimaffimmi pigaartuunngitsut peerneqaannarsimanerat ernumanarpoq.

Ersarissarneqartariaqarpoq biilersuit imermik assartuutit aammalu biilit slanginik assartuutit immikkut inissimalersillugit. Sumiiffinni mittarfeqartuni slanginik assartuutit amigartutut isikkoqarput, imermik pilersuinissamut aallerfissat ungasippallaarsinnaaneri tikikkuminaassinnaanerilu pissutaallutik. Ilanngullugu ersarissartariaqarsorinarpoq,



upalungaarsimanermi inatsimmi § 10 naammassineqarsinnaanngimmat atortut annikinnerpaaffii allanngortinneqanngippata.

Nunaqarfinni qatserisartut amerlassusaannik ikinnerpaaffiliiniarnermi kommunit tusarniaavigineqarsimanngitsutut isikkoqarput. Assersuutigalugu Qeqqata Kommunua nammineerluni amerlassusiliinikuuvoq nunaqarfinni qatserisartut ikinnerpaamik arfineq marluussasut. Tamanna sunik tunngaveqarnerseq paasiniallugu ikinnerpaaffissaliisoqarsimanersaq paaserusunnarpoq.

Atortorissaaruteqarnikkullu minnerpaaffiliisimaneq eqqarsaatigalugu atortut sorpiaat pigineqassanersut ersarissarneqartariaqarpoq. Ullumikkut nunaqarfinni amerlasuuni qatserinermi atortorissaarutit ilinniartitaanikkullu inissisimaneq eqqarsaatigalugit suliassat pingaarnersaraat inunnik annaassiniarnissaq. Taama oqarsinnaavugut pissutigalugu ilinniartitaanikkut atortorissaaruteqarnikkullu inissisimaneq pitsanngimmata. Tamannalu Upalungaarsimanermi Inatsimmi § 1-mi piumasaqaataasunut inuuppoq. Tassanimit inuit, pigisat avatangiisillu annaanniarneqartussaammata. Taamatullu sullivinni avatangiisit pitsaasut piumasaqaatigineqartut equutsinneqarnissaat qulakkeerneqartariaqarpoq.

Nunatsinni inoqarfiit tamarluinnarmik sinerissamut qanittumi inissisimapput, Kalaallillu Inuiaat imaanik atuisuuneq ulluinnarni inuunermut ilaatilluinnarpaat. Imaani ajutoortoqartillugu annaassiniarnissamut suliassat SAR-itut ittut upalungaarsimanermi suliallit akisussaaffingngikkaluarpaat. Inoqarfinnili tamani isumalluutaasartut tassaagajupput upalungaarsimanermik suliqartut. Politiit SAR-imik akisussaasut aqqartartoqanngillat, allatigulluunnit imaani annaassiniarnissamut suliassaartillutik amerlasuutigut upalungaarsimanermi suliqartunut ikiortissarsiortarput.

Nalunaarummi pineqartumi allassimavoq navianaatillit aallaavigalugit annertussusiliinerit ingerlanneqassasut. Ilumullu ilinniartinneqarsimanerat pisimanersaq apeqqutaalerpoq. Taamatullu ingerlatsinissamik aqqissuussisinnaasoq tassaavoq Upalungaarsimanermi immikkoortortaqarfik Naalakkersuisoqarfimmi attuumassutilimmi inissisimasoq.

Upalungaarsimanermi inatsit maanna ukiuni 13-ini pisoqaassuseqarpoq. Amerlasuutigullu naleqqussaavigineqarnissaa pisariaqalernikuusutut isikkoqarpoq. Tamannalu anguneqartariaqarpoq ulluinnarni tamakkuninnga suliallit peqatigalugit, minnerunngitsumillu Kalaallit Nunaanni Qatserisartut Peqatigiiffiat suleqatigeqqissaarlugu.

Nunatsinni qatserisartunik ilinniartitsineq annertuumik maanna kinguussaaqqasutut oqaatigisariaqarpoq, Kalaallit Nunaanni Qatserinermut Ilinniartarfimmut aningaasat 2.460.000 kroniinnaat nuna tamakkerlugu qatserisartunut 900 sinnilinnut atugassiissutigineqartarput.



Taamalu annikitsiginera ernumanaateqarpoq. Aningaasanut inatsimmi qatserisartunut ilinniarfiup saniani allassimavoq, ilinniartut angerlarsimaffiannut Apisseq-mut ingerlatsinermut aningaasartuutissat ukiumut 1.240.000 kroniusut. Tassuunaannaq takusinnaavarput ilinniarfimmu aningaasat qanoq annikitsiginersut, kollegiemut ataatsimut sanillitissagaanni. Takuinnarlugulu eqqarsarnarsinnaavoq Kalaallit Nunaanni Qatserinermut Ilinniarfiup ilinniartunut inissiaqarfik Apisseq akilersoraa. Kommunit amerlanerit pujorsiortunik amigaateqarput, kommunit tamarmik holdlederinek amigaateqarput, kommunit tamarmik indsatslederinek amigaateqarput, kommunit tamarmik ikuallatsaaliinermut sulinissaminnut ilinniarsimasunik amigaateqarput, kommunit tamarmik qatserisartunik pikkorissaasinnaasunik amigaateqarput minnerunngitsumillu nalunaarut 62 eqqarsaatigissagaanni “risiko baseret dimensionering”-imut ilinniartitsinissaq amigaatigineqarpoq.

Kaajallaasitaq nr. 1, 1. april 1994-meersumi sumiiffinni amerlassusiliinerit inissineqarsimapput. Tassaniipputaaq sumiiffinni qatserisartut qaammammut ajunngitsorsiassaannut tunngasut. Taamanikkulli ersarippoq sumiiffinni assigiinngitsuni, qanoq innuttaqqortussuseqarneq aallaavigalugu akissaasersuineq. Suliat assigiit akisussaaffiit assigiit sumiikkaluaraanniluunnit assigiittariaqarput. Tamannalu isumaqatigiissitsiniartarfimmu suliakkiutigisaqassasoq Siumumit isumaqarpugut. Eqqortuusinnaanngilarmi naalagaaffimmu sakkortuumik piumasaqarsinnaagutta, uagullu ilutsinni tamanna aqqiivigisimanaguluunnit.

Oqartussaaffiit upalungaarsimanermi suliaqartut suliassaqarfii ersarissarneqartariaqarput. Politiit suliassaraat SAR, tassa ujaasineq annaassiniarnerlu. Qaqqani annaassiniartoqassatillugu maanna takornartaanngilaq politiit kommunini upalungaarsimasunik suliakkiigaangamik suliassap kiap akilissaneraa saqitsaassutaasarluni. Tassanilu ajornartoortoq qitiunani aningaasat qitiulersarput. Taamatuttaaq ippoq assersuutigalugu timaani ajutoortoqarsimappat annaanniagassanngorluni. Ajoqusertoq naluneqanngilaq sumiittoq sunalu ajutoorutigineria. Suliassaq tullinnguuttoq tassaalersarpoq ajoqusersimasup napparsimmavimmu ingerlanneqarnissaa. Tamannalu Peqqinnissaqarfiup suliassaraa. Tamannali aamma kiap akilissaneraa saqitsaassutaasarpoq. Inuk qitiususanngorlugu suliassanik agguaasseqatigiinneq ersarinnerusumik inatsisitigut tunngavissinneqartariaqarpoq. Aningaasat qitiunatik ajornartoortut ikiorasuarneqarnissaat qitiutinneqartariaqarpoq.

Innuttaasut toqqissisimasumik ulluinnarni inuussappata upalungaarsimaneq maannakkornit annertunerujussuarmik ukkatarineqartariaqarpoq. Upalungaarsimanermi aqutsisoqarfimmit suliassat assigiinngitsorpassuit suliarineqarsinnaapput. Qatserisartoqarneq, imaani annertuumik ajutoortoqarnerani annaassiniarneq, tassani takornariartaassuit ajutuussagaluarpata annaassiniarnissamut upalungaarsimanermullu tunngassuteqartut, avatangiisinik annertuumik mingutsitsisoqassagaluarpat upalungaarsimaneq, qaqqani nunallu timaani annaassiniarnermut



ataqatigiissarineq allarpasuillu qitiusumit akisussaaffigineqartut ataqatigiissarneqartussat  
annertuut amerlasuut suliaqarfigissavaat.

Apeqqutigineqartut ullut suliffiusut qulit iluanni akeqquneqarput.